

ՀՀ ԿԱ պետական եկամուտների կոմիտե
Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 4/1

19 ապրիլի 2016 թ.

Քննարկվեց Ա/Ձ Գոհարիկ Եղոյանի 21.03.2016թ-ի գանգատը ՀՀ ՖՆ իրավաբանական վարչության պետի 01.02.2016թ-ի թիվ 311479/02 որոշման դեմ:

Ա/Ձ Գոհարիկ Եղոյանի գանգատում բերված փաստարկները.

ՀՀ ՖՆ իրավաբանական վարչության պետի կողմից 28.08.2015թ-ին կայացվել է թիվ 294311/02 որոշումը, համաձայն որի Գոհարիկ Եղոյանը ենթարկվել է վարչական պատասխանատվության 2-րդ եռամսյակի ԱՏԳ հաշվետվությունը չներկայացնելու համար: Ա/Ձ Գոհարիկ Եղոյանն իր գործունեության ընթացքում ունեցել է միայն մեկ գործարք՝ 30.06.2015թ-ին, արտահանում Քուվեյթ և արտահանել է անասնակեր՝ առվույտ, որն ունի 12149090 ԱՏԳԱԱ ծածկագիրը: Ա/Ձ Գոհարիկ Եղոյանի կողմից 30.06.2015թ-ին Քուվեյթ արտահանած ապրանքի ԱՏԳԱԱ ծածկագիրը ներառված չէ 01.04.2002թ-ի թիվ 299 որոշման հավելված թիվ 2-ով ներկայացված ցանկում, ուստի նա չպետք է ներկայացներ ԱՏԳ հաշվետվություն: Այս փաստը ներկայացվել է ՀՀ Կենտրոնի ՏՀՏ իրավաբանական բաժին, որտեղից Ա/Ձ Գոհարիկ Եղոյանին բանավոր պարզաբանել են, որ տեղի է ունեցել վրիպում և ուշացված է եղել ոչ թե ԱՏԳ հաշվետվությունը, այլ 2-րդ եռամսյակի շրջանառության հաշվարկը: Ա/Ձ Գոհարիկ Եղոյանը սահմանված կարգով և ժամկետներում կատարել է տուգանքի վճարումը և ներկայացրել է ժամանակին չներկայացրած 2-րդ եռամսյակի շրջանառության հարկի հաշվարկը:

01.02.2016թ-ին ՀՀ ՖՆ իրավաբանական վարչության պետի կողմից կայացվել է թիվ 311479/02 որոշումը, համաձայն որի Ա/Ձ Գոհարիկ Եղոյանը ենթարկվել է վարչական պատասխանատվության 2-րդ եռամսյակի շրջանառության հարկի հաշվարկը սահմանված ժամկետում չներկայացնելու համար:

Փաստացի Գոհարիկ Եղոյանը միևնույն խախտման համար կրկնակի անգամ ենթարկվել է վարչական պատասխանատվության: Նշված փաստի առթիվ 01.02.2016թ-ի թիվ 311479/02 որոշումը վերադասության կարգով բողոքարկվել է: Ի պատասխան բողոքարկման ՀՀ ՖՆ 2-րդ բաժնի պետի 23.02.2016թ-ի թիվ 11-7/6596-16 գրությամբ տեղեկացվել է, որ միևնույն խախտման համար կրկնակի անգամ վարչական պատասխանատվություն չի կիրառվել, քանի որ առաջին անգամ տուգանել են 2015թ-ի 2-րդ եռամսյակի ԵՏՄ անդամ պետություններից ներմուծված ապրանքների վերաբերյալ հայտարարագիրը սահմանված ժամկետում չներկայացնելու համար, իսկ երկրորդ անգամ՝ 2015թ-ի 2-րդ եռամսյակի շրջանառության հարկի հաշվարկը սահմանված ժամկետում չներկայացնելու համար:

Վերը նշված փաստի առթիվ կրկին դիմում է ներկայացվել, ուստի որոշումը չեղյալ անելու պահանջը փաստացի մերժվել է, իսկ որպես մերժման պատճառ է բերվել ԵՏՄ երկրներից ներմուծման հայտարարագիր չներկայացնելը, այն պարագայում, երբ Ա/Ձ Գոհարիկ Եղոյանը ԵՏՄ երկրներից ներմուծում կամ արտահանում չի ունեցել: Նշվածի վերաբերյալ 02.03.2016թ-ին վերադասության կարգով կրկին բողոք է ներկայացվել, որով բողոքարկվել է 23.02.2016թ-ի թիվ 11-7/6596-16 գրության պատասխանը: 16.03.2016թ-ին ի պատասխան դիմումի Կենտրոն ՀՏ իրավաբանական բաժնից տեղեկացվել է, որ կազմված վարչական ակտերի վրիպումների և սխալների պատճառ է հանդիսացել իրենց աշխատակցի թերի աշխատանքը, սակայն կայացված որոշումը հնարավոր չէ չեղարկել ժամկետների լրացման պատճառով:

Ելնելով վերոգրյալից՝ Ա/Ձ Գոհարիկ Եղոյանը խնդրում է չեղյալ համարել ՀՀ ՖՆ իրավաբանական վարչության պետի 01.02.2016թ-ի թիվ 311479/02 որոշումը:

ՀՀ ֆինանսների նախարարության հարկային և մաքսային մարմինների գանգատարկման հանձնաժողովի եզրակացությունը.

ՀՀ ՖՆ հարկային և մաքսային մարմինների գանգատարկման հանձնաժողովը (այսուհետ նաև Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության:

Քննարկման ընթացքում նշվեց, որ ՀՀ ՖՆ իրավաբանական վարչության պետը, քննելով 01.02.2016թ-ի վարչական իրավախախտման վերաբերյալ արձանագրությունը և կից նյութերը, պարզել է, որ Ա/Ձ Գոհարիկ Եղոյանը սահմանված ժամկետում չի ներկայացրել 2015թ-ի 2-րդ եռամսյակի շրջանառության հարկի հաշվարկը, որի համար նախատեսված է վարչական պատասխանատվություն: Նկատի ունենալով, որ արարքը նախատեսված է «Վարչական իրավախախտումների վերաբերյալ» ՀՀ օրենսգրքի 169.1-րդ հոդվածի 2-րդ մասով, ուստի ղեկավարվելով նույն օրենսգրքի 32-րդ հոդվածի 2-րդ մասով, 244.2-րդ, 281-րդ հոդվածներով և 282-րդ հոդվածի 1-ին կետով՝ ՀՀ ՖՆ իրավաբանական վարչության պետի կողմից 01.02.2016թ-ին ընդունվել է վարչական իրավախախտման գործի վերաբերյալ թիվ 311479/02 որոշումը (այսուհետ՝ Որոշում) Ա/Ձ Գոհարիկ Եղոյանի նկատմամբ վարչական տույժ նշանակելու մասին՝ գումարով 20.000 դրամի չափով:

Սույն գործում առկա ապացույցների ուսումնասիրության արդյունքում Հանձնաժողովը եկավ եզրակացության, որ Որոշումը կայացվել է «Վարչական իրավախախտումների վերաբերյալ» ՀՀ օրենսգրքով նախատեսված պահանջների խախտմամբ, հետևյալ պատճառաբանությամբ.

«Վարչական իրավախախտումների վերաբերյալ» ՀՀ օրենսգրքի 37-րդ հոդվածի համաձայն. «Վարչական տույժը կարող է նշանակվել իրավախախտումը կատարվելու օրվանից ոչ ուշ, քան երկու ամսվա ընթացքում, իսկ շարունակվող և տևող իրավախախտման դեպքում՝ այն բացահայտվելու օրվանից երկու ամսվա ընթացքում, բացառությամբ սույն հոդվածով նախատեսված դեպքերի»:

Քննարկվող դեպքում Ա/Ձ Գոհարիկ Եղոյանը վարչական պատասխանատվության է ենթարկվել 2015թ-ի 2-րդ եռամսյակի շրջանառության հարկի հաշվարկը սահմանված ժամկետում չներկայացնելու համար:

«Շրջանառության հարկի մասին» ՀՀ օրենքի 9-րդ հոդվածի 1-ին մասի համաձայն. «Շրջանառության հարկ վճարողները մինչև հաշվետու ժամանակաշրջանին հաջորդող առաջին ամսվա 20-ը Հայաստանի Հանրապետության կառավարությանն առընթեր պետական եկամուտների կոմիտեի սահմանած ձևով իրենց հաշվառման վայրի հարկային մարմին են ներկայացնում շրջանառության հարկի հաշվարկը»:

Տվյալ դեպքում Ա/Ձ Գոհարիկ Եղոյանի կողմից իրավախախտումը կատարվել է 2015թ-ի հուլիսի 21-ին, սակայն վարչական տույժը նշանակվել է միայն 01.02.2016թ-ին: Այսինքն, վարչական տույժը նշանակվել է «Վարչական իրավախախտումների վերաբերյալ» ՀՀ օրենսգրքի 37-րդ հոդվածով նախատեսված ժամկետի խախտմամբ, այն է՝ իրավախախտումը կատարվելու օրվանից երկու ամիս հետո ընկած ժամանակահատվածում:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի և «Մաքսային ծառայության մասին» ՀՀ օրենքի 37-րդ հոդվածի պահանջներով հանձնաժողովը՝

ո Ր Ո Շ Ո Ւ Մ Է՝

Բեկանել ՀՀ ՖՆ իրավաբանական վարչության պետի 01.02.2016թ-ի թիվ 311479/02 որոշումը, իսկ գործը՝ կարճել:

Հանձնաժողովի նախագահ՝

